

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

ZAKLJUČAK

**O odbacivanju Zahtjeva za pokretanje postupka zbog stvarne nenadležnosti
(„avaz-roto press d.o.o. Sarajevo“ protiv Stranke demokratske akcije (SDA) i
predsjednika SDA Tihić Sulejmana)**

**Sarajevo
decembar, 2010. godine**



Broj: 01-05-26-026-2-II/10
Sarajevo, 15.12.2010. godine

Na temelju člana 42. stav (2), a u vezi sa članom 26. Zakona o konkurenciji («Službeni glasnik BiH», br. 48/05, 76/07 i 80/09), i člana 58. stav (4) Zakona o upravnom postupku Bosne i Hercegovine («Službeni glasnik BiH», br. 29/02, 12/04, 88/07 i 93/09), a rješavajući po Zahtjevu za pokretanje postupka podnesenog od strane privrednog subjekta „avaz-roto press“ d.o.o. Sarajevo, Tešanjaska 24 a, Sarajevo, Bosna i Hercegovina, koga zastupa Sanja Isanović, direktor društva, zaprimljenog dana 8.11.2010. godine pod brojem: 01-05-26-026-II/10, Konkurencijsko vijeće, na 6. (šestoj) sjednici održanoj dana 15. 12. 2010. godine, je donijelo

Z A K L J U Č A K

1. Odbacuje se Zahtjev za pokretanje postupka zbog narušavanja tržišne konkurencije podnesen od strane privrednog subjekta „avaz-roto press“ d.o.o. Sarajevo protiv Stranke demokratske akcije BiH i Sulejmana Tihića, predsjednika Stranke demokratske akcije BiH zbog stvarne nenadležnosti Konkurencijskog vijeća.
2. Ovaj Zaključak će biti objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 08.11.2010. godine pod brojem: 01-05-26-026-II/10, zaprimilo Zahtjev za pokretanje postupka (u daljem tekstu: Zahtjev) privrednog subjekta „avaz-roto press“ d.o.o. Sarajevo, Tešanjaska 24 a, Sarajevo, Bosna i Hercegovina, (u daljem tekstu: Avaz – roto press ili Podnosilac zahtjeva), kojeg zastupa Sanja Isanović, direktor društva, protiv Stranke demokratske akcije BiH (u daljem tekstu: SDA BiH), Mehmeda Spahe 14, Sarajevo, Bosna i Hercegovina i Sulejmana Tihića, predsjednika SDA BiH.

U svom Zahtjevu Podnosilac zahtjeva navodi kako su dana 01.10.2010. godine, SDA BiH i Sulejman Tihić, predsjednik SDA BiH izdali, odštampali i distribuisali na području Federacije BiH lažnu novinu „Bosanska stvarnost“ kojom prilikom su neovlašteno upotrijebili zaštićeni vanjski oblik, individualni žig i dizajn dnevnog lista „Dnevni avaz“

sa lažnim sadržajem, čime su izazvali pometnju na tržištu jer se pojavila novina koja je naizgled istovjetna sa „Dnevnim avazom“ i za koju su građani mislili da je „Dnevni avaz“. Tu su novinu dijelili besplatno, čime su SDA BiH i Sulejman Tihić nanijeli ekonomsku štetu Podnosiocu zahtjeva, izdavaču „Dnevnog avaza“, ali i samoj novini.

Kako je navedeno u Zahtjevu, ovo je izazvalo narušavanje tržišne konkurencije na području na kojem se dijelila novina, a naročito imajući u vidu da je povrijeđen i aktuelni Zakon o industrijskom vlasništvu BiH. Naime, „Dnevni avaz“ ima zaštićeni individualni žig, upisan u Institut za standarde, mjeriteljstvo i intelektualno vlasništvo BiH, pod brojem BAZ993642, uključujući vanjski oblik dnevnog lista „Dnevni avaz“ – glavu novine, zaštićene boje: crvenu, bijelu i crnu (znak) i font slova na naslovnici novine. Na posljednjoj stranici lažne novine „Bosanska stvarnost“ naznačeno je da je izdavač Stranka demokratske akcije, ul. Mehmeda Spahe 14, Sarajevo, iako ista nije ovlaštena ni registrovana za poslove izdavaštva, a ni izdana novina nije upisana u registar kod nadležnog ministarstva.

Podnosilac zahtjeva smatra da opisano djelovanje predstavlja zabranjeni sporazum iz člana 4. stav (1) tačka a) Zakona o konkurenciji.

Uvidom u podneseni Zahtjev, Konkurencijsko vijeće je ustanovilo da opisano činjenično stanje ne spada u nadležnost Konkurencijskog vijeća u smislu Zakona o konkurenciji, te se Podnosilac zahtjeva upućuje da zaštitu svojih prava i interesa ostvari putem nadležnih organa.

Imajući u vidu navedeno, Konkurencijsko vijeće je donijelo odluku kao u dispozitivu.

Pouka o pravnom lijeku

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema ovog Zaključka.

Predsjednik

dr Stjepo Pranjic